

Pop unn ab

Also wenn jetz um die Zeit e paar Leit zesommekumme unn was schwätze, dann schwätze se garandiert iwver was Grienes. Ob iwver die Parteie, iwver Atom odder Kummern, iwverall werrd iwver Grienes geredd. Also hadde mirs omm Stommdisch aach von was Grienen.

Saach emol, hott mich de Karl gefroocht, was heeßden eichenlich Pop-ab, dess was Pop-up geschriwwe werrd?

Ich habb emm ze Antwort gewwe: Pop iss was Musikalisches. Oogenumme, die spille Pop in de Stadthall unn du bist debei, dann mussde uff die Donzfläch unn musst hippe, ob de willst odder nitt. Unn Pop-ab heeßt: Hipp uff wenn de Pop kimmt!

Dollbohrer, sät de Schorsch, du waaßt gonz genau was de Karl wisse will weils doch um die Pop-abs gieht ferrs Grienzeich.

Ich saach: So enn Pop-ab-Korb, der dut uffspringe, wennde die Kordel odder dess Klettbond uffmächts, was den gonz flach sezommehält, unn dann bleibt der Korb von alloo stieh unn du konnsden mett Grienzeich fille. Der hott aach zwaa Griff unn so kann merr die Uffspringkörb gut traache.

No gut, sät de Karl, awwer vor zwaa Woche hotts joo enn Haufe Ärjer mett dene Pop-abs gewwe, die sinn nitt all geleert worrn

Ja, saach ich, bei uns war dess gonz genau so. Mir hawwe zwaa Sorte von dene Körb, zwaa mett 50 Zentimeter unn ooner mett 75 Zentimeter Dorschmesser. Die kloone hawwe die griene Männer ausgeleert, den große, obwohl nitt vill drin gewese iss unn der deshalb gonz leicht war, denn hawwe die nitt geleert.

De Schorsch hott gesaat: Doo hott doch die Stadt so enn Zettel oiwerfe losse, doo stiht vill druff, wassde derrfst unn wassde losse sollst. Nor iss koon Dorschmesser ferr die Körb oogewwe worrn.

Ja, saach ich, weil die also den große Korb nitt geleert hawwe, habb ich uff der Nummer oogerufe, die uff dem Zettel stieht unn habb erfahrn, dass all die Uffpopper, also aach die große, ausgeleert werrn misse. Dess heeßt, die Männer hawwe enn Fehler gemacht unn wennse beim nächste Mol die nitt leern, soll ich widder oorufe unn dann werrn die Dinger noochträglich geleert.

Moont de Karl: Dess wär geklärt, awwer Babiersäck ohne die Uffschrift „Kilb“ sinn nitt mettgenumme worrn.

De Schorsch sät: Dess mett dene Babiersäck, dess iss joo jetz was Politisches in Flerschem, dess iss wie iwverall, dess Griene stiht zwische de Schwarze unn de Rote. Weil so enn Babiersack soll zwaa Euro kosde unn ich habb noch koon oone Flerscherner getroffe, der zwaa Euro ferr so enn Sack ausgewwe dut. Also dess finanzieren von de Grienzeich-Abfuhr dorsch die deierne Säck dut nitt funktionieren. Ich hätt enn onnern Vorschlaach.

No was ferr ooner?, frächt de Karl.

De Schorsch druff: Entweder die verkaafe drei Säck ferr zwaa Euro odder du konnst die Säck kaafe wo de wills unn die Stadt verkäaft derr enn Stempel unn e Stempelkisse ferr fünf Euro, so e Art Maut ferr Grienzeich, doodemett kann jeder soi Säck, egal wo er die kaaft hott, mett de Uffschrift „Kilb“ stempele. Was halder dann doodefoo?

Ich saach: E gut Idee. Awwer wer kimmden uff sowas – nor mir omm Stommdisch. Eiern Honnes